

童山詩集
六





童山詩集

(六)

李調元撰

王雲五主編
叢書集成初編

童 山 詩 集
六 冊

中華民國二十五年十二月初版

平

著 者 李 調 元

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

童山詩集卷三十六

戊午

正月初七日題曹大姑壁

今年心事頗忡忡。人日題詩又不同。川北羽書飛過境。巴東舟楫更難通。家饒絲竹惟行樂。年逼桑榆志尙雄。蠢爾么麼當就繫。不知誰作漢終童。

清明偕玉溪礎兒至醒園

醒園常見人來醉。試問何人號獨醒。大抵百年俱傳舍。何堪三徑剩危亭。洞無人至空延月。壁有詩題半使星。惟慮柏根拋廢圃。願兒不覺屢丁寧。

困園假山成二絕

困園本是水爲國。安得雲巒慰眼枯。黃鳥生成老夫客。飛來便喜止邱隅。有石瓊瓏似太湖。天涯海角此峯無。蜉蝣不識山移至。猶認槐安是故都。

附同作

張懷淮

愚公移得此山至。歷落嶽崎亦可夸。便有彩雲當面落。是誰偷剪海東霞。

巖巖氣像峨嵋骨。怪底疑從鷲嶺逢。見我欲教頻下拜。原來他是丈人峯。

夏初困園雜興

夏初不是栽移候。昨日枝分小棣棠。惟有游蜂採香慣。飛來依舊宿花房。
乙乙燕爲梁上客。雙雙鳩是借居禽。夜來老鶴悲何事。總爲栖枝失故林。

附同作

一枕遶遶日未昏。無端見蝶夢中翻。醒來疑有遊園客。了鳥風吹自打門。
大几明窗四坐清。案頭卷帖眼偏明。茶鐺故作松風響。錯認沙場鐵馬聲。

悼亡妾林氏廣東人

六如塔下始逢君。十載歸來井臼勤。總爲殤兒埋玉早。前身竊恐是朝雲。
能撫他生倍所生。去年婚嫁備艱辛。如今萬事都無恨。去報黃泉付託人。
楊枝欲遣略商謀。便覓雙顰誓柁舟。畢竟將身先我死。轉慙薄倖是莊周。
同里當年有子都。孫山落第學登徒。可憐誤爾身榮顯。只爲羅敷自有夫。

哭袁子才前輩仍用前韻二首并序

今年四月二十七日。接江寧隨園袁子才前輩少君通書及赴聞。言子才已於丁巳年十一月十七日辰時病故。並言前歲蒙賁函海。遠貽先嚴。當卽肅函申謝。並寄小倉山房全集一部。用答雅

張懷漑

貺並和見寄詩二首。不料託帶書人遇風覆舟。將札及書均被水浸。漫漶不可復識。仍行寄回。此去冬十月杪事也。現在苦聖之中。檢理舊稿。尙未覓得云云。聞之大慟。向南哭之。仍用見和前韻二首。聊寄奉輓。

懸知老子是猶龍。不謂俄成馬鬣封。江上馮夷停鼓瑟。山中師曠不調鐘。六朝風月教誰管。萬里雲天失所宗。自恨彥先慳一面。生芻一束向南供。瓣香遙奉是吾師。望斷龍門百尺枝。詩比漁洋聲更大。老遊粵海集尤奇。可能虎賁中郎似。若箇驢鳴武子知。接罷和章兼接赴。文章萬古更推誰。

同日接江寧王心齋書仍用前韻奉寄二首并序

來書云。簡齋先生。於去年八月接到函海。及尊詩二首。當卽寫書和詩。兼寄小倉山房集及外集。於九月交紅花客余九。從水路帶來。不料至巫峽舟陷溺水。書札皆濕。仍舊帶回。見袁函已開。尙不模糊。因錄詩奉寄云云。與袁少君所言無異。但此書到日。適季夏連雨。亦滲漉不能讀。因仍用子才見和前韻戲答之。

長江豈有愛詩龍。浪打袁詩要拆封。總爲文名驚水府。故通歲月到林鐘。紅花異客原難信。丹桂同年實可宗。到底來書遭雨滲。只宜沉浸當茶供。

此老峨峨百世師。無端千丈倒松枝。書看虎子生成肖。寄到驪珠死後奇。交晚難登名士傳。年衰料得故

人知錦江不少吳船泊。此後郵筒舍子誰。

題門生溫莊亭承恭赴華陽幕諸人贈行詩冊並送回粵秋闈二首

見說溫生遠赴招。贈詩都似贈瓊瑤。蜀中山水重重秀。嶺外文章箇箇超。我老後來難徧識。汝兄見列記名標。冊中諸生。惟記溫瑞柏。德慶州廩生。余曾考列一等第三。與莊亭考列第五。皆庠生。科試同拔。瑞柏。乃其兄也。敲金戛玉誰居一。要讓楊雄自解嘲。莊亭有四六序弁首。甚工。

聞道蓉城動別筵。一帆風送海南船。誰言入幕如王猛。爭看吾門有鄭玄。浪湧珠江魚鼓舞。峯迴羚羊峽鶴騰。胸羅廿史非虛譽。金鑢他年屬史遷。余刻莊亭試牘。有胸羅廿一史之評。

得甯湘維明府錡書知已從清溪回什邡任奉賀

欣聞返署忽開顏。也算生還入玉關。吳質豈能長驥絆。孟嘗終看徙珠還。纔踰相嶺如離藏。望見鑒華當故山。多少荷花如別妾。相逢定各競妖嫵。

和什邡尉周青門自畫墨菊見寄原韻

端陽纔過重陽早。忽見東籬寄一枝。畫菊居然有佳色。不由元亮不題詩。

附

什邡尉周佩蘭青門吳縣

迢遞雲山動遠思。春枝無贈寄秋枝。高風得遇陶彭澤。欲索困園詠菊詩。

青門畫菊見贈余亦以自畫墨梅答之仍用前韻

驛使梅花寄所思。老人特地寫枯枝。菊花既早梅尤早。暑月先催臘月詩。

題青門見惠所畫著色紅梅

着花無醜聖俞詩。我見梅花亦似之。總爲時人貪愛色。故教畫亦點胭脂。

禮汀與余素相愛不知其能畫也近日遣徒靜安以所畫梅蘭見寄爲題二絕句

早把梅花當小姝。嬌藏金屋小西湖。等閑却被禮公覺。畫我姝孃行樂圖。

一生與爾臭如蘭。屢館聽鶯夢亦安。羅漢寺有齋曰聽鶯。余每至必館于此。寄到國香是何意。要余入室共盤桓。

題靜安上人扇上墨蘭卽其師禮汀所畫六泉寄客禮自名也

六泉工小畫。下筆便生風。怪道香難覓。出君懷抱中。

草鞋同張雲谷作

自分身宜着草茅。侯門欲進足先膠。一生不借惟鞋是。半世微官早屣拋。忽見朝韉思舊主。偶逢業屨當新交。老夫近頗遊山健。只恐難隨拄杖跑。

附

張邦伸

一緇芒鞋遠寄將。着來兩脚便輕涼。不同貴客烏靴樣。雅趁山人箬笠裝。花徑杖藜行較穩。禪堂對奕脫無妨。朝天久斷王喬夢。一任窗前晒夕陽。

玉溪夏日寄懷詩二首有如何閒却絲綸手只向西湖下釣竿之句依韻答之

萬金買得自由身。野鶴山猿分外親。豪氣未除猶倔強。機心已盡尙難馴。花開護草增新慟。果熟文林感舊臣。縱使朝廷不遺舊。爲言已作廢材人。脚不穿鞋首不冠。客來最怕叙溫寒。愁迎官府長稱老。喜見兒孫屢問安。亦有西湖供嘯傲。偶逢東郭便盤桓。六旬又五終何用。十四年來一釣竿。

附

張懷淮

得醉何妨換告身。田夫牧豎日相親。豹文畢竟終歸隱。龍性生原未易馴。名刺不書前進士。頭銜舊是老詞臣。近來海外梯航使。頻問中朝第一人。

二十年來早掛冠。蕭齋風雨不勝寒。髻邊白髮悲潘岳。天下蒼生望謝安。尊酒隨時多遣興。溪山佳處每盤桓。如何閒却絲綸手。只向西湖下釣竿。

題白塔寺井序

白塔寺在安縣東四十里。古神泉縣也。元中統元年。割石泉軍置安州。以神泉西昌爲輔邑。至元十三年。併入安州。屬龍安。洪武改爲縣。本朝雍正五年。改屬綿州。西昌卽今花街鎮。神泉卽今白塔寺。有塔水場寺。在瓜菜山下。有神泉一名金線灘。嘉慶三年。住持月上補葺山門。屬余題詩。

神泉自昔推名縣。歲閱滄桑塔尙存。不有跛僧新整頓。焉知古寺舊根源。玉峯壁立玉千尺。金線灘流金

萬村從此人文當倍出。吾詩聊當鎮山門。

六月六日遊何氏梨樹園有懷九臯弟兄

詩翁不見三年久。大谷園中偶載過。枉有哀梨千百顆。鄰家食比主家多。種號壺蘆得最難。惟君園裏結成團。近來也學吾家李。一樣嫌疑不正冠。自從園主久分離。典與旁人自守梨。却被黃鶯偷啄落。未成先吃鳥傷虧。偶來樹下避炎天。一顆因風墮我前。不是老年牙齒缺。有梨須讓長兄先。

有好梓詩稿者多假吾名作序極力自譽以弁稿端吾實不知作詩解嘲

作詩豈爲賺虛名。况復虛名賺不成。剗鵠終嗤鷺相類。假狐空笑虎隨行。失誣自愧春秋筆。過獎難稱月旦評。寄語後人須細察。品題多未識韓荆。

題何體齋晉茹山莊

晚晴漸覺步趨輕。便令肩輿亦侍行。松嶺未踰吾已倦。栢林欲訪主先迎。豆棚瓜架山家樂。茅屋蓬門國士聲。兩碗濃茶消酷暑。歸來一路草風清。

夏日四首在大女何氏家中作時方寡居

霹靂轟轟遠近聞。前山有雨後山晴。作禽莫作鴈鳩婦。風雨聲中過一生。車水田中水不加。炎天辛苦是農家。涼棚少婦弓鞋小。手帶嬰兒足踏車。

聞道山村革社開。民因祈雨搭高臺。漫言影戲非真戲。金鼓聲喧雨已來。
四蟲爲害祀宜虔。爲禱青苗小斂錢。所望田神惟滯穗。就中寡婦實堪憐。

聽何體齋彈琴

不識琴中趣。欣聞琴外聲。總因人蘊藉。故爾調和平。能得松風意。還移海水情。無絃何必蓄。長笑老淵明。

題節婦橋二首并序

節婦橋者。綿州生員何坤妻王氏所建也。橋在丙戌堰下流。碑文爲先君乾隆己卯年三月初十日撰。碑刻本名節壽。因何九臯遷橋於東。而以碑移於何氏塋西。砌石圈之。人跡罕到。故俗呼節婦橋。卽所謂桂花塋也。今桂已不存。祇黃連樹覆蔭碑上。文字未滅。因託其姪上青錄藏於家。

丙戌堰前己卯碑。先君手澤字依稀。桂花已老人何在。猶蔭黃連樹百圍。
何子書齋傍水坳。爲言近歲屢遷橋。縱然碑隔東西遠。尙有人呼節婦橋。

夏日村行十絕句

日上平林似火然。草根珠露尙涓涓。偶來細徑攜筇過。無數蝦蟆躍入田。
暑天處處火雲蒸。喜見雲晴雨又興。自是近年蔬米貴。兼將豇豆種禾塍。
攜得解人何體齋。隨身筆硯早安排。每逢水際聽鶯去。不覺穿林到界牌。
四面山光撲翠微。出門處處闌芳菲。蜻蜓也有隨遊興。故向前途導客飛。

忽見青苗苞漸抽。今年不患不豐收。稻花最怕狂風雨。暗禱天公鎖石尤。
沙鑽襪底水鑽鞋。不用人扶豈用僮。莫道村行無好處。隔溪一朵槿花開。
秧田缺處水爭鳴。尙似春耕水不平。我曉水聲無別意。稻黃該讓水長行。
樺柳當天日正中。濃陰也算小蒼蒼。乘涼不用蒲葵扇。享受人間自在風。
叩門得遇好鄰居。一碗清茶一火爐。便有老農來共語。裸裎袒裼講唐虞。
劉家五尺小書童。見我如逢圉上翁。揖入董帷深處坐。今番不怕蠓蚊蟲。

附

受業何晉茹體齋

日上鎔金樹欲然。淙淙堤畔愛流涓。農家似以鄰爲壑。剩水隨他放出田。
天邊霞蔚夏雲蒸。助我騷情勃勃興。栽滿豆苗行不得。更無捷徑到田塍。
茅屋溪西別築齋。何愁詩料未安排。田書十字秧書井。便是天生好韻牌。
良苗都趁好風抽。四面峯巒一刻收。好似嘉州江上路。凌雲九頂望烏尤。
尋幽不枉踏芒鞋。路到窮時村復來。獨樹合歡誰氏宅。柴扉各自背江開。
樺柳河邊雀亂鳴。隔村一望暮山平。涪江晚放誰家艇。一葉中流自在行。
平生最愛竹虛中。風簾千梢月半弓。正欲開襟納清爽。隔橋吹送稻花風。
攏檣縱橫一徑微。尋涼緩步踏芳菲。小禽何處藏身穩。偷見人來忽地飛。

不是家居是飢居。思量澤國避洪爐。水深不遇乘輿產。路斷何妨假道虞。
錦囊收罷付奚童。箇箇爭看老蠢翁。歸去不知筋骨倦。三更猶自注魚蟲。

重遊石巖菴贈然愷上人三首 偕何體齋作

石巖有兩菴。上下非一處。客喜上山行。僧返下山住。昔我偕九臯。遨遊尙健步。今同小阮來。全仗藍輿雇。
然公本故人。曾在茶坪遇。一見笑相迎。先使蔭美樹。問我胡不襪。赤脚乃無屨。知我欲登山。爲引山中路。
靈山不在高。須有靈泉流。名利不在古。須有名人遊。聞昔有三高。讀書山中樓。其一居高甲。頃刻登瀛洲。
宦海多翻覆。場屋生戈矛。古人骨已朽。爭此如天球。高第高簡高節。皆明綿州進士。而節以羅江縣籍。登
嘉靖壬辰賜進士及第三人。由編修署吏部員外郎。以科場事敗。充軍。今兩地猶爭之。曰高探花我綿人。
我羅人也。惟有一脈泉。滋滋汔未休。劃壁引入廚。細涓如漚浮。不須竹筴遞。已見盈缸收。山僧昏入鼎。請
客品茶甌。畢竟與他水。臭味分薰蕕。使可凡胎換。豈止痼疾瘳。安知百載後。我輩名不留。

此巖以石名。有似宋星隕。上聲。由星化爲石。尙未鑿混沌。年深纏松蘿。地茂紛荃蕘。橫者如走坂。高者如
廩困。大如犀象獰。小如豺虎狠。蜿蜒臥龍長。蹠踖駘駒窘。其一如蝦蟆。口若銜芝菌。其一如鯨鯢。腹可吞
舟盡。就中爲石巖。大廈缺欄楯。下可建丈旗。上可設鉤盾。何子頗好奇。以身探虛牝。笑謂昔崩石。未知今
可穩。崖逼竹房欹。泉入樹根隱。不知何地庖。美饌備蔬筍。

題石巖寺後竹二首

從來修竹不受暑。多竹誰家可款門。不料石巖菴後路。無端走入此君村。偶檢清幽後佛堂。開門似展畫圖方。只銷臥對幾竿竹。風不來時也自涼。

笑僕

我聞六月其蟲僕。始識人爲世上蟲。但使爲人真不愧。何妨不挂一絲風。

瑞菴草書歌

瑞菴草書學懷素。筆法頗似長沙僧。自言此中得三昧。書家莫與吾爭能。懷素所失在奔放。君獨尺寸有衡量。懷素遺譏在疎野。君獨準繩歸大雅。不信試看杜甫秋興詩八首。濡筆何淋漓。神妙已令鄭虔服。醉勢不使張顛知。忽如高峯之矗天。忽如大石之墜地。忽如風送而雲收。忽如霞生而月至。烟霏霧結斷仍連。鳳翥龍盤軒復輕。一齊盆入手冊中。難與懷素分真僞。瑞菴沒後今幾年。伯英衣鉢無人傳。近來草書誰似此。惟有吾家礎兒子。

訪何九臯書屋題詩二首奉懷

睽違又是幾秋春。不見台山老斲輪。往日酒場成畏友。近時詩社算斯人。未完婚嫁應回首。遊遍江湖可轉身。寄語神傷荀奉倩。應思伉儷倍酸辛。

自笑衰頹老不禁。猶能拄杖過梨林。一生只與酒無分。萬事獨於詩用心。尙憶紅梅同首唱。夙蒙青眼許知音。君見贈詩有不知幾百歲。再復有斯人句深愧不當。經君門口君知否。蛛網書窗鼠弄琴。

遊松山寺訪高氏祠堂

山門以內盡秧田。想見山荒缺粥饘。一箇善人方念佛。兩廊衲子不參禪。宗祠隔代成龕子。廟宇當年捨宅廬。香火不忘高氏德。松山精舍榜猶懸。寺中有松山精舍四字。乃明雲南副使高第墨蹟。今尙刻匾殿門。

何二妹家招飲爲賦四絕句

鶴髮雞皮鬢各絲。寒泉時動凱風思。老來尙記兒童事。亂用諸兄筆硯時。積善從來慶有餘。含飴日日樂何如。只餘一事心常歉。有子偏慵讀父書。一家婦女盡知詩。刺繡才完卽硯池。漫道蕭娘風韻老。贈夫新什勝關雎。甥元如繼委山陰丞德陽蕭君超羣第四女。名鳳齡。曾學詩于余。有送外赴試句云。願君早折蟠宮桂。無負孀姑教子心。

最憐弱女小天天。書卷何曾手暫拋。解乞雨村詩話讀。免教時傍綠窗抄。

二妹明年年屆五旬。擬爲預慶妹言。若使孤兒得名勝於老嫗。得壽時甥元茹未歸。因廣其意作二絕寄之。

家世相傳女孝經。撫孤八歲續門庭。但求鳳詔來雙闕。勝似蟠桃祝萬齡。昔年晝荻說歐陽。况復荆釵有孟光。如此遭逢遠遠出。倚閭何以慰高堂。

惱人二首

惱人俗物只添睡。急走偏無楚簾床。妹解涼風北窗意。爲兄置榻候羲皇。
惱人俗物漸來稀。一覺南柯夢起遲。怪道碁前三尺水。原來風雨不曾知。

七月初一日入安縣界牌聞禁戲答安令

言子當年宰武城。割雞能使聖人驚。前言戲耳聊相戲。特送絃歌舞太平。
昔日江東有謝安。也曾攜伎遍東山。自慙非謝非攜伎。幾箇伶兒不算班。

耳鳴二絕

六十應當耳順時。今逢又五耳難提。昨宵蟻鬪聞牛鬪。錯怪誰家牧犢兒。
偶臨樹下復溪邊。總覺蜩鳴嘒嘒然。借問旁人聞見否。方知是我耳中蟬。

寄呈大司農沈雲椒先生初二首

鳳望稜稜佩水蒼。欣聞司會領文昌。履聲曉步丹墀上。劍影宵衝紫極旁。
皓首自應憐北海。瘦腰可是舊東陽。江湖廊廟音書闊。聊復題詩慰渺茫。
當年曾記倚蒹葭。謬荷齊名玉樹誇。武庫昔原推杜預。度支今復見張華。
已從天上司喉舌。肯見人才惜齒牙。若問童山近何事。一竿漁艇老生涯。

燕梨二絕戲何體齋

肺病連朝頗短神。秣陵佳種摘來新。憑君寄語征南道。蒸食哀梨竟有人。

誰言參也魯非愚。曾爲蒸梨便逐妻。明歲應求乞枝接。免教眉與案難齊。

寄懷墨莊鳧塘兩弟二首并序

上次翰林大考。墨莊由檢討改授中書。今次大考。鳧塘復由春坊中允改授編修。因作二詩慰之。
一寄墨莊。一寄鳧塘。

又見孤鴻向北征。秋風忽動鵲鵲情。勸君休抱龍門恨。如我曾叨鳳閣榮。紅藥翻時詩可咏。紫薇宿處夢俱清。長安漫說居非易。蜀道連年正用兵。今年大考翰林題爲征。邪教疏。

官是宮闈典棘聞。去年門戶頗光輝。三魚定應占台象。六鵷緣何又退飛。詩稿校成何日梓。宦囊蕭索幾時歸。老兄搔首無他望。望汝持衡再賜緋。鳧塘乙卯典試山左。旋獲晉階中允。故云。

和京中學士王春甫懿修寄示種竹見懷仍用前韻

聞道呼來不上船。長安日臥酒爐邊。此君本是君家物。憶我遙知我亦然。月影萬夫嫌舊句。胸中千畝喜新篇。將軍敢詡園林勝。縣竹從來產自緜。

附階前種竹數竿頗堪銷夏遙想秧塘老前輩竹林之勝因次見贈元韻

翰林學士王懿修春甫青陽

新營瓦屋小如船。種得琅玕碧檻邊。疑是人來風乍動。明知借住日常然。思君惜少渭川句。贈我應多池上篇。珍重平安須屢報。邇來陰雨太連綿。